

ԱԶԴԱՐԱՐ

ՏԵՐԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒԷՅԹԻ ԵՒ ԱՐԱՐԱԿԱՆ ԾՈՑԻ ԵՐԿԻՐՆԵՐՈՒ ԹԵՄԻՆ
P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, 2. Տարի, Թիւ 258, Ուրբաթ, 21 ՆՈՅԵՄԲԵՐ, 2014

ՀԱՄԱՅՆՔԱՅԻՆ

ՀԵՐԹԱԿԱՆ ԴԱՍԱԽՕՍԱԿԱՆ ԵՐԵԿՈՅ ՔՈՒԷՅԹԻ ՀԱՅ ԴԱՏԻ ՅԱՆՁՆԱԽՈՒՄԲԻ ԿԱԶՄԱԿԵՐՊՈՒԹԵԱՄԲ



Հովանավորութեամբ՝ Թեմիս Կաթողիկոսական Փոխանորդ Գերպ. Տէր Մասիս Ծ. Վրդ. Զօպույեանի եւ կազմակերպութեամբ՝ Քուէյթի Հայ Դատի Յանձնախումբին, Չորեքշաբթի, 19 Նոյեմբեր 2014ին Սրբոց Վարդանանց Եկեղեցոյ մէջ տեղի ունեցաւ դասախօսական երեկոյ մը, «21րդ դարու երիտասարդութեան յաջողութեան նպաստող հմտութիւններ» խորագրով:

Բացման խօսքը արտասանեց Քուէյթի Հայ Դատի Յանձնախումբի ատենապետ Պրն. Տիգրան Պայաթեան, որ տեղեկացուց, թէ Յանձնախումբը մտահոգ ըլլալով երիտասարդ սերունդի հարցերով, կը ծրագրէ անոնց յուզող թեմաներուն մասին կլոր սեղաններ ու դասախօսական երեկոներ կազմակերպել:

Բացման խօսքը արտասանեց Քուէյթի Հայ

Այնուհետեւ ան հրաւիրեց օրուան դասախօսներ՝ Տիկ Սօսի Սիմիկեանն ու Պրն. Յակոբ Էմրազեանը: Անոնք առաջին հերթին ներկայացուցին 21րդ դարու ընձեռած հնարավորութիւններն ու կարելիութիւնները, որոնց ճիշդ կիրարկման պարագային կարելի է ունենալ յաջող ընթացք ու առաւել հաստատուն քայլերով ընթանալ աննախընթաց յառաջիադացքով ընթացող դարուս մէջ:

Տիկ. Սօսի Սիմիկեան ներկայացուց նաեւ աշխարհի շարք մը երկիրներու մէջ որդեգրուած կրթական համակարգերը, որոնք կը միտին լաւապէս ապահովել պատանիներու եւ երիտասարդներու հոգեմտաւոր զարգացումը:



Պրն. Մինաս Հանսքեհեան (Քուէյթի Ազգային Վարժարանի նախկին տնօրէն եւ վերոնշեալ հարցերով մասնագիտական ուսումնասիրութիւններ կատարած) օգտուելով Պրն. Տիգրան Պայաթեանի ընձեռած հնարավորութենէն, ներկայացուց իր բանաձեւը, կոչ ուղղելով ունենալ հաւատք, յոյս ու դարուս առաջարկած բարեփոխումները ընդունելու պատրաստակամութիւն:

Հուսկ իր խօսքը արտասանեց Թեմիս Կաթողիկոսական Փոխանորդ Գերայ. Ս. Մասիս Ծ. Վրդ. Զօպույեան, որ բարձրօրէն գնահատելով Հայ Դատի նախաձեռնութիւնն ու ելոյթ ունեցող դասախօսները, վեր առաւ ազգային պատկանելիութեան հարցը, յիշեցնելով, որ համաշխարհային մակարդակի բոլոր նուաճումներուն մէջ մեծ դեր ունի ազգային գործօնը: Գերայ. Հայր Սուրբը ուրախութեամբ տեղեկացուց, որ Միջին Արեւելեան երկիրներուն մէջ ապրող հայ երիտասարդութիւնը կը մնայ ապահով, որովհետեւ անոր գլուխը կը շարունակէ մնալ Հայ Եկեղեցին, Հայ Դպրոցն ու հայկական միութիւնները:

Յիշեցնենք, որ սոյն դասախօսական երեկոն Յանձնախումբի երկրորդ նախաձեռնութիւնն էր՝ նուիրուած Քուէյթի հայ երիտասարդներուն:

Ճորճ Արապաթլեան

ՀՆԴԻԿ ԵԿԵՂԵՑԻՈՅ ԱՌԱՋՆՈՐԴԻՆ ԱՅՑԵԼՈՒԹԻՒՆԸ ԱԶԳԱՅԻՆ ԱՌԱՋՆՈՐԴԱՐԱՆ

Երեքշաբթի, 18 Նոյեմբերին Հնդիկ Ուղղափառ Եկեղեցւոյ Առաջնորդ՝ Գերշ. Տէր Մալիվաս Մար Թէօտոսիոս Եպիսկոպոսը այցելեց Քուէյթի Առաջնորդարանն ու Սրբոց Վարդանանց Եկեղեցին: Սրբազան Հօր կ'ընկերակցէին Հնդիկ Ուղղափառ համայնքի երկու քահանաները՝ Տէր Ռաճու Թումասն ու Տէր Ռեճի Վարկասը, ինչպէս նաեւ Համայնքի Ատենապետ Պրն. Շաճի Ապրահամն ու Քարտուղար Պրն. Ժագոպ Թրոկը:



Թեմիս Կաթողիկոսական Փոխանորդ՝ Գերայ. Տէր Մասիս Ծ. Վրդ. Զօպույեան եւ Եկեղեցւոյ Հոգեւոր Հովիւ Արժ. Տէր Արտակ Քինյ. Քէհեաեան, դիմաւորեցին Հնդիկ Ուղղափառ պատուիրակութիւնը եւ սիրալիր ու ջերմ մթնոլորտի մէջ զրուցեցին Քուէյթի մէջ երկու համայնքներու եկեղեցական կեանքի վերաբերեալ հարցերը: Հնդիկ առաջնորդը մեծ գոհունակութեամբ խօսեցաւ նաեւ Ն.Ս.Օ.Տ.Տ. Արամ Ա. Կաթողիկոսի Հնդկաստան այցելութեան մասին, ուր երկու քոյր եկեղեցիներու պետերը, ունեցած են հանդիպումներ:



ՀԱՅԿԱԿԱՆ

ՀՅԴ Բիւրոյի Կոչը

Միբեյի՛ հայրենակիցներ,

2014 թուականի նոյեմբերի 28-ին Հայաստան համահայկական հիմնադրամն իր տարեկան աւանդական դրամահաւաքի հեռուստամարաթոնով շարունակելու է անցեալ տարի սկզբնաւորուած Վարդենիս-Մարտակերտ ճանապարհի կառուցմանն ուղղուած նուիրատուութիւնների ծրագիրը:



Յատկապէս վերջին ամիսների Ազրպէյճանի անթաքոյց թշնամական գործողութիւնները, պատերազմի նախապատրաստական ջանքերը եւս մէկ անգամ փաստում են հիմնադրամի՝ Արցախի անվտանգութեանն ու զարգացմանը միտուած ջանքերի կարեւորութիւնն ու այժմեականութիւնը:

Այլընտրանքային եւ ռազմավարական մեծ նշանակութիւն ունեցող այս ճանապարհի կառուցումը յաւելեալ երաշխիք է ազատագրուած հայրենիքի սահմանների անվտանգութեան համար: Այն կոչուած է եւս մէկ անգամ փաստելու մեր հակառակորդներին եւ բարեկամներին հայ ժողովրդի անսասան վճռականութիւնն ու միասնական կամքը՝ արդարացի հանգուցալուծման բերելու արցախեան ազատամարտը:

Մեր զաւակների առ այսօր թափուող արեամբ ազատագրուած Լեռնային Ղարաբաղի Հանրապետութիւնը ուժեղանալու, զարգանալու է նմանատիպ ծրագրերի իրականացմամբ:

Առ այդ, ՀՅԴ Բիւրոն կոչ է ուղղում համայն հայութեանը՝ առատաձեռն կերպով մասնակցելու համահայկական այս դրամահաւաքին եւ օժանդակելու հեռուստամարաթոնի կազմակերպման աշխատանքներին:

Համախումբ ուժով եւ ճիգով միայն կարելի է արցախեան պայքարը հասցնել իր յաղթական աւարտին:

**ՀԱՅ ՅԵՂԱՓՈԽԱԿԱՆ
ԴԱՇՆԱԿՑՈՒԹԵԱՆ
ԲԻՒՐՕ**

Ռեյխսի. «Ես Գոհ Չեմ Սահմանագիծին Վրայ Տիրող Իրավիճակէն»

Հայաստանի մէջ Իրանի դեսպան Սոհամետ Ռեյխսի՝ լրագրողներուն հետ ունեցած զրոյցին ընթացքին մեկնաբանելով Ազրպէյճանի կողմէ վար առնուած դարաբաղեան ուղղաթիռին դէպքը ըսած է. «Ես գոհ չեմ սահմանագիծին վրայ տիրող իրավիճակէն»:

Դեսպանը յոյս յայտնած է, որ Հայաստան եւ Ազրպէյճան դարաբաղեան հարցը խաղաղ միջոցով կը լուծեն: «Ես յոյս ունիմ, որ Ազրպէյճան եւ Հայաստան կը շարունակեն բանակցութիւնները եւ կը հասնին խնդիրի լուծման՝ առանց բանակներու միջամտութեան: Այդ հարցը պէտք է լուծուի միայն խաղաղ միջոցով», ըսած է դեսպանը:

Եւրոպական Խորհուրդի Խորհրդարանական Վեհաժողովը «Յիշած» Եւ Դատապարտած Է Ազրպէյճանը՝ Սաֆարովը Ազատ Արձակելուն Համար

Եւրոպական խորհուրդի Խորհրդարանական վեհաժողովի մնայուն յանձնախումբը դատապարտած է Ազրպէյճանը՝ բանտարկեալներու արտայանձման մասին համաձայնագիրը Ռամիլ Սաֆարովը անյապաղ ազատ արձակելու նպատակով օգտագործելուն համար:



Յանձնախումբը բանաձեւը ընդունած է Բրիտանիոյ պատուիրակ Քրիսթոֆըր Չոփի զեկուցումին հիման վրայ, ուր մտահոգութիւն կը յայտնուի, որ համաձայնագիրը կիրարկուած է Ազրպէյճանին յանձնելէ ետք Ռամիլ Սաֆարովի անյապաղ ազատ արձակումը արդարացնելու համար:

Բանաձեւին մէջ կ'ըսուի, որ համաձայնագիրը նախատեսուած չէ դատապարտեալներու՝ հայրենիք հասնելուն պէս անյապաղ ազատ արձակման համար:

«Ընդունելով, որ անդամ-պետութիւնները, տուեալ համաձայնութեան 12-րդ յօդուածով բանտարկութեան դատապարտուած անձերու ներման եւ համաներման գերիշխան իրաւունք ունին, Եւրոպական խորհուրդի Խորհրդարանական վեհաժողովը կը յիշեցնէ, որ միջազգային յարաբերութիւններուն մէջ բարեխղճութեան սկզբունքները կը ճանչցուին նաեւ Միջազգային համաձայնագիրներու իրաւունքի մասին Վիեննայի համաձայնագիրով, ինչպէս նաեւ օրէնքի գերակայութեան սկզբունքները կը պահանջեն, որ համաձայնագիրները մեկնաբանուին իրենց նպատակներուն եւ խնդիրներուն համապատասխան», ըսուած է բանաձեւին մէջ:

Հունգարիոյ մէջ ցմահ բանտարկութեան դատապարտուած ազրպէյճանցի սպայ Ռամիլ Սաֆարով 2012 թուականի օգոստոսի վերջաւորութեան արտայանձնուած էր Ազրպէյճան: Հայրենիք հասնելուն պէս հայ սպան գազանաբար սպաննելուն համար դատապարտուած յանցագործը արդարացուած, պաշտօնի բարձրացում եւ պարգեւներ (տուն եւ 8 տարուան աշխատավարձ) ստացած էր:

Վարչապետ Արրահամեան Աշկապատ Կը Մեկնի

Հայաստանի Հանրապետության վարչապետ Յովիկ Արրահամեանի գլխաւորած կառավարական պատուիրակութիւնը երկօրեայ աշխատանքային այցելութեամբ այսօր կը մեկնի Թուրքմենիստան՝ մայրաքաղաք Աշկապատի մէջ մասնակցելու համար Անկախ պետութիւններու համագործակցութեան (ԱՊՀ) մասնակից պետութիւններու կառավարութիւններու ղեկավարներու խորհուրդի հերթական նիստին:

Այցելութեան ծիրին մէջ վարչապետ Յովիկ Արրահամեան առանձին հանդիպում պիտի ունենայ Թուրքմենիստանի նախագահ Կուրպանկուլի Պերտիմուհամետովի հետ: Նախատեսուած է նաեւ Հայաստանի, Ռուսիոյ, Պիեթրոսիոյ, Ղազախստանի եւ Խըրիզգիստանի կառավարութիւններու ղեկավարներու հանդիպում:

Եւրոպական Խորհուրդի Խորհրդարանական Վեհաժողովը «Յիշած» Եւ Դատապարտած Է Ազրպէյճանը՝ Սաֆարովը Ազատ Արձակելուն Համար

Եւրոպական խորհուրդի Խորհրդարանական վեհաժողովի մնայուն յանձնախումբը դատապարտած է Ազրպէյճանը՝ բանտարկեալներու արտայանձման մասին համաձայնագիրը Ռամիլ Սաֆարովը անյապաղ ազատ արձակելու նպատակով օգտագործելուն համար:

Յանձնախումբը բանաձեւը ընդունած է Բրիտանիոյ պատուիրակ Քրիսթօֆըր Չոփի զեկուցումին հիման վրայ, ուր մտահոգութիւն կը յայտնուի, որ համաձայնագիրը կիրարկուած է Ազրպէյճանին յանձնելէ ետք Ռամիլ Սաֆարովի անյապաղ ազատ արձակումը արդարացնելու համար:

Բանաձեւին մէջ կ'ըսուի, որ համաձայնագիրը նախատեսուած չէ դատապարտեալներու՝ հայրենիք հասնելուն պէս անյապաղ ազատ արձակման համար:

«Ընդունելով, որ անդամ-պետութիւնները, տուեալ համաձայնութեան 12-րդ յօդուածով բանտարկութեան դատապարտուած անձերու ներման եւ համաներման գերիշխան իրաւունք ունին, Եւրոպական խորհուրդի Խորհրդարանական վեհաժողովը կը յիշեցնէ, որ միջազգային յարաբերութիւններուն մէջ բարեխղճութեան սկզբունքները կը ճանչցուին նաեւ Միջազգային համաձայնագիրներու իրաւունքի մասին Վիեննայի համաձայնագիրով, ինչպէս նաեւ օրէնքի գերակայութեան սկզբունքները կը պահանջեն, որ համաձայնագիրները մեկնաբանուին իրենց նպատակներուն եւ խնդիրներուն համապատասխան», ըսուած է բանաձեւին մէջ:

Հունգարիոյ մէջ ցմահ բանտարկութեան դատապարտուած ազրպէյճանցի սպայ Ռամիլ Սաֆարով 2012 թուականի օգոստոսի վերջաւորութեան արտայանձնուած էր Ազրպէյճան: Հայրենիք հասնելուն պէս հայ սպան գազանաբար սպաննելուն համար դատապարտուած յանցագործը արդարացուած, պաշտօնի բարձրացում եւ պարգէներ (տուն եւ 8 տարուան աշխատավարձ) ստացած էր:

www.armenianprelacykw.org

Կիպրոսի Խորհրդարանի Նախագահը «Նոր Օսմանեան» Անուանած Է Թուրքիոյ Գործելաճը

Հայաստանի եւ Կիպրոսի փոխադարձ աջակցութիւնը հիմնուած է ամուր հիմքերու վրայ: Այդ մասին յայտարարած է Կիպրոսի Ներկայացուցիչներու տան նախագահ Եանաքիս Օմիրուն՝ երէկ խօսք առնելով Հայաստանի Ազգային ժողովի նիստին ընթացքին:

«Այդ փոխադարձ աջակցութիւնը կոփուած է մեր ժողովուրդներուն միացեալ պայքարներով մինչեւ այսօր տառապանքի ենթարկող ընդհանուր թշնամիին դէմ, ինչպէս նաեւ ընդհանուր արժէքներու եւ սկզբունքներու հիման վրայ, որոնց մենք հաւատարիմ ենք», ըսած է Օմիրու:

Ան Կիպրոսի խորհրդարանականներուն եւ ժողովուրդին անունով երախտագիտութիւն յայտնած է Հայաստանի վարած սկզբունքային եւ կայուն քաղաքականութեան համար՝ «յանուն մեր երկրի եւ ժողովուրդի ազատութեան եւ վերամիաւորման»: «Մեզի յայտնի է այն գինը, որ դուք կը վճարէք ձեր աջակցութեան համար, որուն համար ալ երախտապարտ ենք ձեզի», յայտարարած է Օմիրու:



«Հակառակ Անգարայի յառաջացուցած բարդութիւններուն՝ Կիպրոս եւ Հայաստան պէտք է աշխուժացնեն երկկողմանի յարաբերութիւնները, միաւորեն միջազգային կազմակերպութիւններուն մէջ իրենց ուժերը եւ օգտագործեն կիպրական եւ հայկական սփիւռքի լծակները որոշումներ կայացնող ատեաններուն մէջ՝ ընդհանուր ճակատ ձեւաւորելով ընդդէմ Թուրքիոյ քաղաքականութեան: Ներկայացուցիչներու տան անդամներուն եւ իմ անունովս այդ ուղղութեամբ գործելու ամբողջական պատրաստակամութիւն կը յայտնեմ», յայտարարած է Եանաքիս Օմիրու, որ երէկ նաեւ տեսակցած է վարչապետ Յովիկ Աբրահամեանի հետ:

Ողջունելով հիւրերը՝ վարչապետը նշած է, որ Հայաստանի եւ Կիպրոսի միջեւ պատմականօրէն ձեւաւորուած են ջերմ, բարեկամական յարաբերութիւններ, եւ նման բարձր մակարդակի պաշտօնական այցելութիւնները կը նպաստեն երկկողմանի կապերու ամրապնդման եւ ընդլայնման: «Մեր ժողովուրդները իրարու կապուած են դարաւոր կապերով, որոնք ամուր հիմք են միջպետական յարաբերութիւններու, առեւտրատնտեսական կապերու, զինուորական եւ կրթամշակութային մարզերուն մէջ գոյութիւն ունեցող յարաբերութիւններու ամրապնդման եւ հետագայ զարգացման համար», նշած է վարչապետը:

Եանաքիս Օմիրու բարձր գնահատած է հայ-կիպրական ոչ միայն երկկողմ, այլեւ բազմակողմ համագործակցութիւնը եւ աշխուժ որակած ասիկա՝ ընդգծելով, որ ատոր մեծապէս կը նպաստէ նաեւ կիպրահայ համայնքին գործունէութիւնը: Յովիկ Աբրահամեան շնորհակալութիւն յայտնած է հայ համայնքին նկատմամբ Կիպրոսի իշխանութիւններուն ցուցաբերած յարգալից եւ ջերմ վերաբերմունքին համար:

Գոհունակութիւն յայտնելով երկու երկիրներուն միջեւ քաղաքական երկխօսութեան բարձր մակարդակին համար՝ զրուցակիցները կարելոյ նկատած են նաեւ առեւտրական-տնտեսական

գործակցութեան աշխուժացումը: Այս ծիրին մէջ վարչապետը անհրաժեշտ նկատած է գործարարներու փոխադարձ հաղորդակցութիւններու աշխուժացումը՝ տնտեսական կապերու ներուժը բացայայտելու եւ գործակցութեան նոր ուղղութիւններ նախագծելու համար:

Կողմերը գոհունակութիւն յայտնած են առ այն, որ Հայաստան եւ Կիպրոս միշտ աջակցած են իրարու եւ հաւասարակշռուած դիրքորոշում դրսեւորած Լեւոնային Ղարաբաղի տագնապին եւ Կիպրոսի խնդիրի լուծման հարցին մէջ՝ կարեւոր նկատելով անոնց խաղաղ լուծումը, միջազգային իրաւունքի սկզբունքներու եւ չափանիշներու հիման վրայ:

Յովիկ Աբրահամեան եւ Եանաքիս Օմիրու խօսած են նաեւ Հայոց ցեղասպանութեան ճանաչման հոլովոյթին մասին եւ անդրադարձած Մեծ եղեռնի 100-ամեակի ծիրին մէջ Հայաստանի եւ Կիպրոսի մէջ տեղի ունենալիք ոգեկոչման եւ յիշատակի ձեռնարկներուն, որոնց կը մասնակցին ինչպէս հայաստանեան, այնպէս ալ կիպրական բարձրաստիճան պաշտօնական պատուիրակութիւններ:

Հայոց Ցեղասպանութեան 100-Ամեակի Վրաստանի Յանձնախումբին Հերթական Ժողովը

Նոյեմբեր 4-ին վիրահայոց թեմի «Հայարտուն» կեդրոնին մէջ տեղի ունեցաւ Հայոց ցեղասպանութեան 100-ամեակի Վրաստանի յանձնախումբին հերթական ժողովը՝ ներկայութեամբ թեմի առաջնորդ Վազգէն եպս. Միրզախանեանի:

Նկատի ունենալով Վրաստանի մէջ հասարակական, պետական կառոյցներու եւ անհատ գործիչներու՝ Հայոց ցեղասպանութեան 100-ամեակի շրջագիծին մէջ ծրագիրներ կազմակերպելու ցանկութիւնը, յանձնախումբը այսուհետեւ պիտի ստանձնէ առաջարկուող ծրագիրները համակարգելու եւ անոնց աջակցելու պարտաւորութիւնը եւ այս կապակցութեամբ յայտարարութեամբ հանդէս պիտի գայ վրացահայ հասարակութեան առջեւ:

Նիստին ընթացքին քննարկուեցաւ նաեւ ՄԱԿ-ի կողմէ ընդունուած «Ցեղասպանութեան յանցագործութեան կանխման եւ պատժման» շրջագիծին մէջ, Վրաստանի մէջ Հայաստանի դեսպանութեան, Վրաստանի պետական եւ հասարակական կառոյցներու հետ համագործակցութեամբ, կազմակերպել եւ նշել այդ օրը, որուն ընթացքին ներկայացնել ազգային եւ կրօնական հողի վրայ իրականացուած ոճրագործութիւնները՝ հիմնական շեշտը դնելով Հայոց ցեղասպանութեան վրայ:

Որոշուեցաւ յատուկ շնորհակալագիրներ փոխանցել այն երկիրներու դեսպանութիւններուն, որոնք ընդունած եւ դատապարտած են Հայոց ցեղասպանութիւնը: Նաեւ շարունակել դիմել տարբեր երկիրներու դեսպանատններուն՝ Հայոց ցեղասպանութեան ճանաչման եւ դատապարտման խնդրանքով: Անհրաժեշտ նկատուեցաւ նաեւ Հայոց ցեղասպանութեան մասին վրացերէնով գրքոյկ հրատարակելու անհրաժեշտութիւնը:

Յանձնախումբը որոշեց յաջորդ ժողովը կայացնել դեկտեմբերին:

www.aztagdaily.com

ՄԻՋԱԶԳԱՅԻՆ

Թուրքիոյ Վարչապետին Իրաք Այցելութեան Նախօրեակին. Մասուտ Պարազանի Կը Քննադատէ Միջազգային Դաշինքը

Իրաքի քրտական ինքնավար շրջանի նախագահ Մասուտ Պարազանի երէկ բուն կերպով քննադատեց միջազգային դաշինքը, որ «պէտք եղած ձեւով չի հակազդեր ՏԱՀԵՇ-ի յարձակումներուն: Պարազանի այսօր պիտի տեսակցի Թուրքիոյ վարչապետ Ահմէթ Տաւրթօղլուի հետ, որ պաշտօնական այցելութեամբ Իրաք պիտի ժամանէ:

Խորհրդակցութիւնները պիտի ընդգրկեն երկկողմանի յարաբերութիւններն ու տիրող լարուած վիճակը, յատկապէս Էրպիլի եւ Քերքուքի մէջ երկէ՛ չորեքշաբթի պատահած ահաբեկչական պայթումներուն լոյսին տակ:

Զօրաւոր Պայթում Մը Ցնցեց Էրպիլը

Մէկ տարուան կայունութենէ ետք զօրաւոր պայթում մը երէկ կանուխ առաւօտուն ցնցեց Իրաքի քրտական ինքնավար շրջանի մայրաքաղաք Էրպիլը՝ պատճառելով մարդկային եւ նիւթական ծանր կորուստներ: Էրպիլի նահանգապետարանին կից գտնուող շուկային մէջ անձնասպանական գործողութեամբ կատարուած ահաբեկումին գծով պատասխանատուութիւնը ցարդ որեւէ կազմակերպութիւն չստանձնեց: Գերմանիա խոստացաւ 4000 զինեալներու բաւարար զինամթերք ուղարկել քիւրտ փեշմերկաներուն:

Ֆրանսա Կը Մասնակցի ՏԱՀԵՇ-ի Դէմ Կատարուող Յարձակումին՝ Քերքուքի Մէջ

«Ռաֆալ» տիպի ֆրանսական երկու օդանաւեր մաս կազմած են միջազգային դաշինքի շղթայագերծած յարձակումներուն ՏԱՀԵՇ-ի դէմ՝ Քերքուքի մէջ: Ֆրանսայի պաշտպանութեան նախարարութիւնը յայտնեց նաեւ, որ ֆրանսական «Միրաժ» տիպի վեց օդանաւեր պիտի տեղակայուին Յորդանանի մէջ՝ մասնակցելու համար ՏԱՀԵՇ-ի դէմ Միացեալ Նահանգներու գլխաւորած միջազգային դաշինքի յարձակումներուն: Այս գծով ցարդ ոչ մէկ արձագանգ կայ Յորդանանի պատկան մարմիններուն կողմէ:

Հազար Ֆրանսացիներ Կը Կռուին ՏԱՀԵՇ-ի Կողքին

Ֆրանսական լրատու գործակալութիւնը, Ֆրանսայի վարչապետ Մանուէլ Վալսի վերագրելով իր տեղեկութիւնները, յայտնեց, որ հազար ֆրանսացի քաղաքացիներ կը կռուին Իսլամական պետութեան կողքին: Ըստ նոյն աղբիւրին, ցարդ յիսուն ֆրանսացի ժիհատական զինեալներ սպաննուած են Սուրիոյ մէջ՝ անոնց ՏԱՀԵՇ-ի կողքին կռուելու սկսելէն ի վեր: Նշենք, որ ՏԱՀԵՇ-ի ցուցադրած նորագոյն տեսերիզին մէջ կարելի եղած է ստուգել երկու ֆրանսացի ժիհատականներու ինքնութիւնը, ըստ Ֆրանսայի նախագահ Ֆրանսուա Հոլլանտի յայտարարութեան:

ԱՆՂԱՐԱՐ

Երեւանը Մեկուսացուող Մոսկուայի Եւ Ապամեկուսացուող Թեհրանի Միջեւ

Հիւլէական թղթածրարի հարցին շուրջ միջազգային ընտանիքի 6+1 ձեւաչափով տարուող բանակցութիւնները այն տպաւորութիւնը կը ստեղծեն, թէ կը միտին Իրանի ապամեկուսացման: Նախադրեալները կը յուշեն, որ Արեւմուտքը, յատկապէս Միացեալ Նահանգներ, ելքեր կը փնտռէ Իրանի հետ յարաբերութիւններու նոր էջ բանալու: Հիւլէականի հետ կապուած իւրանիումի հարստացման սահմանափակումի պահանջներն ու ընդառաջումներու ելեւէջները հիմնովին քաղաքական շարժառիթներ ունին:



Ընթացքը այնպէս է, որ Ռուսիոյ մեկուսացման դիմաց Իրանի ապամեկուսացման միտումներ կը դրսեւորուին Միացեալ Նահանգներու առաջնորդութեամբ, ինչ որ նաեւ կը յատկանշէ Իրանի հետ բանակցութիւններու աշխուժացումը եւ դրական արդիւնքներու յանգման հաւանականութիւններու բարձրացումը:

Իրանի գործօնին նկատմամբ Միացեալ Նահանգներու յարափոփոխ դիրքորոշումները իրենց ազդեցութիւնը կ'ունենան Երեւանի ուղղութեամբ. մանաւանդ որ միւս կողմը Ռուսիան է այս պարագային, որուն նկատմամբ որդեգրուած պատժամիջոցները կը ստանան հետեւողական մագլցողականութիւն:

Հայաստանի Հանրապետութեան երկու ռազմավարական գործընկերներուն նկատմամբ կիրարկման ընթացքի մէջ է հակոտնեայ քաղաքականութիւն: Մեկուն ուղղութեամբ պատժամիջոցներու որդեգրում, միւսին ուղղութեամբ պատժամիջոցներու հետզհետէ վերացում:

Պահ մը կեդրոնանանք ապամեկուսացուող Թեհրանին եւ Երեւանին միջեւ կայացած վերջին համաձայնութեան վրայ:

Իրանն ու Հայաստանը համաձայնագիր կնքած են հայկական տարածքի վրայ ջրէլէկտրակայանի կառուցման վերաբերեալ: Այս մասին յայտարարութիւն ըրած է Իրանի ուժանիւթի նախարար Համիտ Չիտչեանը: «Ստորագրուած է համաձայնագիր՝ Հայաստանի մէջ ջրէլէկտրակայան կառուցելու վերաբերեալ, եւ այդ երկրին մէջ

իրանական կազմակերպությունները շուտով պիտի սկսին աշխատանքներուն», յայտարարած է Իրանի ուժանիւթի նախարարը:

Բայց նաեւ՝ այս տեղեկութեան վրայ:

Իրանա-ազրպէյճանական սահմանին փոխհրաձգութիւն տեղի ունեցած է, Բայահանլի գիւղին մօտ. իսկ փոխհրաձգութեան մասնակցած են ազրպէյճանցի սահմանապահները եւ թմրավաճառները: Այդուհանդերձ ազրպէյճանական պետական մարմինները չեն հաստատած այս տեղեկութիւնները:

Վերլուծական ամփոփ հայեացք նետելէ առաջ, անտեղի չ'ըլլար յիշելը նաեւ Իրանի նախագահին Պաքու այցելութիւնը, որ համընկնեցաւ Ղարաբաղի միջադէպին հետ, երբ Ազրպէյճանը ռուսական հրթիռային համակարգով խփած էր հայկական ուղղաթիռը: Ռուսներն կարելոր յայտարարութիւն ըրած էր Պաքուի մէջ՝ ըսելով, որ ղարաբաղեան խնդիրը զինուորական լուծում չունի: Այլ խօսքով, ան սկնարկած է, որ զինուորական արկածախնդրութեան պարագային, չի պատրաստուիր աջակցելու Պաքուին:

Անշուշտ կարելի չէ սահմանային միջադէպը գերազնահատելով յանգիլ այն եզրակացութեան, որ իրանաազրպէյճանական սահմանը լարուած իրավիճակի մէջ է: Սակայն, այն, որ զսպում յարաբերութիւններ կան Թեհրանի եւ Պաքուի միջեւ, ատիկա փաստ է: Ծագումով ազերի բազմամիլիոնանոց ազգաբնակչութիւնը երկու պետութիւններուն համար զսպիչ գործօնի հանգամանք ունի:



Իրանի ապամեկուսացման նախադրեալներ, Թեհրան-Երեւան ուժանիւթային բնոյթի համաձայնութեան կնքում, Իրան-Ազրպէյճան սահմանային միջադէպ, նախագահ Ռուսներին յատկանշականութեամբ չառանձնացող այցելութիւն Պաքու եւ յայտարարութիւն՝ Արցախի հարցի լուծումի զինուորական միջոցը բացառելու:

Ուաշինկթըն-Թեհրան բնականոնացման եւ Ուաշինկթըն-Մոսկուա խզման երեւոյց միտումի նախադրեալները իրենց ազդեցութիւնը կը ձգեն տարբեր տարածաշրջաններու վրայ: Սկսելով Միջին Արեւելքէն, հասնելով Կովկաս: Երեւանը սուր հաւասարակշիռ քաղաքականութիւն կիրարկելու հարկադրանքին առջեւ է:

«Ա.»

ԼՈՒՐԵՐ ԳԱՂՈՒԹՆԵՐԷՆ

Առաջնորդարան Տրուած Այցելութիւններ



* 6 նոյեմբերին Թեհրանի Հայոց թեմի առաջնորդ Սեպուհ արք. Սարգիսեան ընդունեց Շուէտի դեսպանութեան երկրորդ քարտուղար Պիր Լինները, որ նոր պաշտօն ստանձնած էր դեսպանատան մէջ: Պիր գոհունակութիւն յայտնեց այս հանդիպումին համար, իսկ սրբազանը շնորհաւորեց զինք եւ յաջողութիւն մաղթեց իր ապագայ գործունէութեան մէջ: Ան նաեւ որոշ բացատրութիւններ տուաւ հայ համայնքի ազգային-հոգեւոր կեանքին մասին:

* Նոյն օրը սրբազան հայրը ընդունեց Թեհրանի Հայ եկեղեցասէր կանանց միութեան վարչութիւնը: Ան շնորհաւորեց նոր վարչութիւնը, յաջողութիւն մաղթեց անոր անդամներուն եւ թելադրեց, որ նոր ուժերով օժտեն միութիւնը: Սրբազանը միաժամանակ գնահատեց եկեղեցասէր միութեան գործունէութիւնը՝ վեր առնելով հայ կնոջ դերը մեր ժողովուրդի կեանքին մէջ:

* Դարձեալ նոյն օրը Սեպուհ արք. Սարգիսեան ընդունեց Թեհրանի Հայ կանանց բարեգործական ընկերութեան վարչութեան ներկայացուցիչները, որոնք սրբազան հօր զեկուցեցին իրենց աշխատանքներուն մասին: Առաջնորդ հայրը մեծապէս գնահատեց զիրենք՝ անդրադառնալով Ս. Գեորգ եկեղեցոյ շրջափակին մէջ գործող ծերանոցին եւ «Սօսէ Մայրիկ»-ին, որոնք կը գտնուին իրենց հոգածութեան ներքեւ եւ գնահատեց երկու ծերանոցներու նկատմամբ անոնց ունեցած պատասխանատու վերաբերմունքը:

Դոկտ. Ռ. Փիրումեանի Դասախօսութիւնը



Հոկտեմբեր 27-ին «ՀՈՒՄԿ» հաստատութեան կեդրոնին մէջ, նախաձեռնութեամբ նոյն հաստատութեան, տեղի ունեցաւ դասախօսութիւն՝ «Հայոց ցեղասպանութեան արտացոլումը՝ հայ գրականութեան մէջ» թեմայով: Օրուան դասախօսն էր գիտաշխատող, ցեղասպանագէտ եւ «ԵՈՒ. ՄԻ. ԷԼ. ԷԼ.» համալսարանի նախկին դասախօս, դոկտ. Ռուբինա Փիրումեան:

Դոկտ. Ռ. Փիրումեան իր խօսքին մէջ անդրադարձաւ իր աշխատանքներու նախապատմութեան, որ վերածուեցաւ գիտական գործի՝ իր այլ փուլերով: Ան նկատել տուաւ, որ յուշագրութիւնը կը դառնայ վաւերագրութիւն եւ ան կ'ազդէ հասարակական կարծիքի վրայ՝ ըլլալով քաղաքականութեան սկիզբ, որ յաջողութեան եւ մտաւոր պայքարին մէջ ունի իր ուրոյն դերը:

www.yerakouyn.com

Փիրումեան նաեւ անդրադարձաւ այն ընթացքին, որ կը բանեցնեն Թուրքիոյ իշխանութիւնները՝ չեզոքացնելու համար Հայ դատի յաջողութիւններու ընթացքը, յատկապէս՝ 100-ամեակի սեմին:

«Յոնան Դաւթեան»-ի Նախաձեռնութեամբ Դասախօսական Երեկոյ՝ Նուիրուած Ցեղասպանութեան 100-Ամեակին



Հոկտեմբեր 21-ին «Արարատ» մարզաւանի «Շահպազեան» սրահին մէջ «Յոնան Դաւթեան» ուսանողական միութեան նախաձեռնութեամբ տեղի ունեցաւ Ցեղասպանութեան 100-ամեակի առիթով դասախօսական-գեղարուեստական ձեռնարկ:

Օրուան բանախօս Ազատ եւ Ղազուիինի միջազգային համալսարաններու դասախօս-իրաւաբան դոկտ. Ազին ներկայացուց

ցեղասպանութիւն եզրոյթի առումներով գոյութիւն ունեցող տարաբնոյթ ուղղութիւնները:

Բանախօսը ընդգծելով Հայոց ցեղասպանութեան կազմակերպիչներուն անպատիժ մնալու փաստը՝ շեշտեց կարեւորութիւնը հատուցման պահանջներու իրաւական ձեւով քննարկելու հարցին:

Խորհրդարանի մէջ իրանահայութեան երեսփոխան դոկտ. Կարէն Խանլարեան անդրադառնալով պատմութեան նմանօրինակ փաստերուն՝ նկատել տուաւ, որ Ցեղասպանութեան գործադրման ընթացքին բազմաթիւ փաստեր եւ արձանագրութիւններ կան կապուած հայերուն ապաստան տուած թուրք ու քիւրտ ընտանիքներու մասին, աւելցնելով, որ այս գործողութիւնը պէտք է դիտարկել ոչ թէ թուրք ժողովուրդին ուղղուած ընթացք, այլ Թուրքիոյ պետութեան՝ իր ամենաիրաւական հասկացողութեամբ:

Կոմիտաս Վարդապետի Կիսանդրիի Բացում



Նոյեմբեր 2-ին Քոքինիոյ Ս. Յակոբ եկեղեցւոյ շրջափակին մէջ պատարագի աւարտին տեղի ունեցաւ Կոմիտաս վարդապետի ծննդեան 145-ամեակին առիթով՝ Կոմիտասի կիսանդրիի բացում: Կիսանդրիին բացումը կատարեցին թեմի առաջնորդ Խորէն արք. Տողրամաճեան եւ քանդակագործ Լուիֆիկ Զատիկեան:

Բացման խօսքը արտասանեց Միլենա Ասլանեան, որմէ ետք Քոքինիոյ հոգեւոր հովիւ Յովհաննէս արք. Սաղտըճեան ներկայացուց հայ ազգային երաժշտութեան եղերաբախտ վարպետին կենսագրական գիծերն ու

գործունեությունը: Ապա Յովսէփ Ասատուրեան ասմունքեց Կոմիտաս վարդապետին նուիրուած բանաստեղծութիւն մը:

Քանդակի հեղինակ Լուիֆիկ Զատիկեան խօսք առնելով՝ իր ուրախութիւնն ու յուզումը յայտնեց իրեն վստահուած գործին համար:

Առաջնորդ սրբազանը իր ելոյթին մէջ վեր առաւ Կոմիտաս վարդապետին վաստակը ու համազգային արժէքը՝ նշելով, որ 100-ամեակի սեմին գտնուելով, առաջին քայլը առնուած է՝ զետեղելով Կոմիտաս վարդապետին կիսանդրին, որպէսզի մեր ժողովուրդին զաւակները տեսնելով Կոմիտասի դէմքը՝ առաւել եւս փարին եւ կառչած մնան հայ մշակոյթին, Հայ եկեղեցւոյ եւ մանաւանդ մեր ազգային ժողովրդական երգերուն:

Վրաստանի Կրօնական Հարցերով Պետական Գործակալութեան Նախագահը Եւ Աշխատակիցները Հանդիպում Ունեցան Թեմի Առաջնորդին Հետ



Հոկտեմբեր 14-ին վիրահայոց թեմի առաջնորդարանին մէջ տեղի ունեցաւ հանդիպում՝ Վրաստանի Կրօնական հարցերով պետական գործակալութեան նախագահ Զագա Վաշախմաճէի եւ անոր ղեկավարած գործակալութեան աշխատակազմի անդամներուն հետ:

Վիրահայոց թեմի առաջնորդ Վազգէն եպս. Միրզախանեան գոհունակութիւն յայտնեց

այցելութեան համար:

Հանդիպման ընթացքին քննարկուեցան երկու հիմնական հարցեր՝ Վրաստանի մէջ գործող աւանդական կրօնական համայնքներու ֆինանսատրման հարցը եւ խորհրդային տարիներուն վիրահայոց թեմէն բռնագրաւուած եկեղեցիներու պահպանութեան եւ թեմին վերադարձնելու հարցը:

Թեմի առաջնորդը իր պատրաստակամութիւնը յայտնեց համագործակցելու գործակալութեան հետ՝ ի նպաստ Վրաստանի կրօնական համայնքներու խաղաղ եւ միասնական գործունեութեան:

Իր հերթին Վրաստանի կրօնական հարցերով պետական գործակալութեան ղեկավար Զագա Վաշախմաճէն յայտնեց, որ սոյն հարցերը միշտ գործակալութեան ուշադրութեան առարկայ են եւ իրենք աշխատանք կը տանին Վրաստանի մէջ պատմամշակութային ժառանգութիւնը պահպանելու եւ պետութեան կողմէ կրօնական աւանդական համայնքներուն նիւթական օժանդակութիւն ցուցաբերելու համար:

WWW.AZTARAR.COM

ԿՐՈՆԱԿԱՆ

**ԹԻԵՐԸ
ԱՍՏՈՒԱԾԱՇՈՒՆՉԻՆ ՄԷՋ
(Գ. Մաս)**

ԹԻԻ 5

$5 = 4 + 1$

Ինչպես տեսանք թիւ 4-ը Աստուծոյ յայտնութիւնն է Իր ստեղծագործութեան մէջ, որմէ ետք թիւ հինգը կու գայ յայտնելու Աստուծոյ պարգեւները այդ ստեղծագործութեան պայծառացման ու բարգաւաճման համար, Աստուծոյ շնորհքը եւ փրկութիւնը մարդուն, երբ ան ինկաւ իր դիրքէն: Աստուծոյ յարատեւ շնորհքի եւ պարգեւներու յայտնութիւնն է՝ Իր ստեղծագործութեան մէջ: Թիւ 4-ը կը խորհրդանշէ տկար, ինկած եւ ժամանակաւոր աշխարհը, որ իր արարչի շնորհքին պէտքը ունի, այսինքն (4 + 1) պէտք է (5) ըլլայ, որպէսզի դառնայ աստուածային գեղեցկութեամբ, առատութեամբ, զօրութեամբ ու խաղաղութեամբ լեցուն աշխարհ մը:

Ծննդոց գիրքին մէջ կը հանդիպինք մեր հոգեւոր հօր՝ Աբրահամին, որ առաջին անգամ փնտռեց եւ գտաւ կենդանի Աստուածը: Ան Աբրամ կը կոչուէր: Իսկ երբ Աստուծոյ օրհնութիւնը ստացաւ, կոչուեցաւ Աբրահամ: Այսպէս.

Աբրամ, (**ابرام**) Եբրայերէն չորս տարրերով կը գրուի, իսկ

Աբրահամ, (**ابراهيم**) Եբրայերէն կը գրուի հինգ տարրերով

Երկու անուններուն տարբերութիւնը եբրայերէնին մէջ (**П**), իսկ արաբերէնին մէջ (**آ**) գիրն է, որ հայերէնի (h) գիրին կը համապատասխանէ, սակայն եբրայերէնի եւ արաբերէնի մէջ ան հինգերորդ գիրն է, այսինքն՝ թիւ 5-ին նշանն է: Այսպիսով Աբրամին վրայ աւելցած կ'ըլլայ Աստուծոյ շնորհքն ու պարգեւները, որպէսզի դառնայ ընտրուած այն անձը, որուն սերունդէն պիտի ծնէր Քրիստոս՝ բոլոր շնորհքներուն աղբիւրը:

Նոյն շնորհքի եւ պարգեւներու բաժանումի հասկացողութեամբ, կը տեսնենք, թէ ինչպէս Քրիստոս կը կերակրէ 5000 անձ 5 հացով: Մարդ ունի 5 զգայարանք, 5 մատ՝ իւրաքանչիւր ձեռքին վրայ (ձեռքը աշխատանքի խորհրդանշէ է): Իսկ իւրաքանչիւր ոտքի վրայ 5 մատ կայ, որ կը խորհրդանշէ մարդու քալած ճամբու ուղղութիւնը: Մարդ եթէ սրբացնէ իր զգայարանքները, աշխատանքները եւ ուղղութիւնը, այսինքն՝ զանոնք յատկացնէ Աստուծոյ փառքին, ինչ որ իր պատասխանատուութիւնն ու ազատ կամքի որոշումն է, իր վրայ առատօրէն շնորհը կը հեղու, որովհետեւ չկայ պարգեւ անարժանին կամ պատասխանատուութիւնը չարժեւորողին:

Նոր Կտակարանը կը պատմէ 5 իմաստուն կոյսերու եւ 5 յիմար կոյսերու առակը, մեզի ըսելու, որ ձեթը բոլորին հնարաւորութեան տակ է, սակայն մեզի՝ կ'իյնայ կանթեղները ձեթով լեցնելու պատասխանատուութիւնը: Ով շնորհքով կը լեցուի, կ'ապրի երկնային կեանք մը: Անոր համար Քրիստոս կշտացուց $5000 = 5 \times 1000$ մարդիկ: Եթէ 1000 թիւը նկատենք երկնայիններու թիւը, հետեւաբար Քրիստոս իմ կեանքիս մէջ մուտք գործելով զիս պիտի կշտացնէ եւ կեանքս երկնային կեանքի վերածէ: Երբ պատասխանատուութիւններս արժեւորած եմ եւ զգայարանքներս սրբացուցած, հետեւաբար արժանի կ'ըլլամ շնորհի հեղման: Հինգ հազարի կերակրումի հրաշքի պատմութեան մէջ, կը նկատենք, որ Քրիստոս շնորհի հեղումը կատարեց այն ատեն, երբ իրեն բան մը ներկայացուցին, որ իրենց բոլոր ունեցածն էր՝ հինգ հաց եւ երկու ձուկ:

ԹԻԻ (6)

$6 = 4 + 2$ Աստուծոյ ստեղծագործութիւնը, երբ Աստուծոյ հակադրուած է:

$6 = 7 - 1$ Եթէ թիւ 7 կատարելութեան թիւն է, ուրեմն թիւ 6-ը պակասաւոր է:

$6 = 5 + 1$ Եթէ թիւ 5-ը Աստուծոյ մարդուն տուած շնորհն ու պարգեւներու կատարելութիւնն է, հետեւաբար անոր վրայ որեւէ յաւելում Աստուծոյ գործին խաթարումն է:

Ուրեմն թիւ 6-ը անկատարր կամ պակասաւորն է: Ան Աստուծոմէ զրկուած մարդուն կամ Տէր Յիսուս Քրիստոսի զոհագործութիւնը չընդունող թիւն է: Մարդը 6-րդ օրը ստեղծուած ըլլալուն համար իր վրայ թիւ 6-ը կը կրէ: Ան 6 օր կ'աշխատի. իսկ 7-րդ օրը, կապ ունի Աստուծոյ իշխանութեան հետ, հանգիստի օրն է, եւ այդ իսկ պատճառով թիւ 6-ը նաեւ կը խորհրդանշէ աշխատանքը, որովհետեւ մարդը բաժնուեցաւ Աստուծոմէ եւ հեռացաւ Աստուծոյ հետ ունեցած հանգիստ կեանքէն: Թիւ 6-ը նաեւ կը խորհրդանշէ ստեղծագործութեան ամբողջացումը, որովհետեւ 6-րդ օրը Աստուած ստեղծեց մարդը եւ ամբողջացուց իր ստեղծագործութիւնը: Սակայն Աստուծոյ ստեղծագործութիւնը, առանց Իր ներկայութեան, կը մնայ պակասաւոր, հետեւաբար Աշխարհի կատարելութիւնը կ'իրագործուի միայն Աստուծով:

Կանայի հարսանիքին 6 ջուրի կարասներ կային, երբ անոնց վրայ Քրիստոսի շնորհը աւելցաւ, անոնք դարձան ուրախութեան աղբիւրներ:

Փագանը, որ հակաքրիստոսը կը ներկայացնէ, եռապատիկ 6-ով (666) կը խորհրդանշէ չարութեան կատարելութիւնը:

ԹԻՒ (7)

Հոգեւոր կատարելութեան թիւն է: Աստուծոյ գործին մէջ ան յատուկ տեղ կը գրաւէ եւ ամենաշատ կրկնուած թիւն է: Հին Ուխտին մէջ, թիւ 7 եւ իր կրկնապատիկներուն շարքը յիշուած է 287 անգամ: «Եօթներորդ» խօսքը յիշուած է 98 անգամ: «Եօթը անգամ» ըսելաձեւը յիշուած է 7 անգամ: Այսպիսով՝ ընդհանուրին գումարը կ'ըլլայ $287 + 98 + 7 = 392 = 8 \times 7 \times 7$

Եօթը թիւին երբայերէն բառը «Շէւահ», որուն արմատը՝ «Սաւահ», կը նշանակէ կշտացնող կամ լեցնող: Աստուած վեց օրուան ընթացքին աւարտեց իր ստեղծագործութիւնը եւ լեցուց ու կշտացուց աշխարհը: Եօթներորդ օրը հանգստացաւ, որովհետեւ ամէն ինչ բարի էր եւ կատարեալ: Իսկ «Շէւահ» բառին իմաստն է՝ կենալ, հանգստանալ, աշխատանքէ բաւարարուիլ:

«Շապաթ» կամ «Սապաթ» բառերը հանգստեան օրուան անուններն են (հայերէնով՝ Շաբաթ, արաբերէնով՝ Սապթ): Այսպէս՝ շաբթուան օրերը եղան եօթը օրեր, իսկ ութերորդ օրը առաջինին կրկնութիւնն է:

Յայտնութեան գիրքին մէջ կը տեսնենք 7 եկեղեցի, 7 աշտանակ եւ 7 կնիք: Եղիա մարգարէն 7 անգամ աղօթելէ ետք ամպերը երեւցան եւ ինք հանգստացաւ: Ասորի Նեեման 7 անգամ ջուրը մտնելէ ետք իր հիւանդութենէն հանգստացաւ: Յեսուի առաջնորդութեամբ Իսրայէլացիները Տապանակ Ուխտին Երիթովի պարիսպներուն շուրջ 7 օրուան ընթացքին, 7 անգամ շրջապտոյտ կատարելէ ետք պարիսպները վար ինկան (Յես. 6):

$7 = 6 + 1$ անկատար մարդը Աստուծոյ գործով կ'ամբողջանայ եւ կը հանգստանայ: Աստուծոյ գործը ուրիշ բան չէր, եթէ ոչ իր Միածինին զոհագործութիւնը խաչին վրայ, ինկած մարդկութեան փրկութեան համար: այդ կատարուեցաւ Աստուծոյ ստեղծագործութեան եօթներորդ օրը, որ տակաւին ընթացքի մէջ է եւ մենք կ'ապրինք զայն ամէն օր, մինչեւ Քրիստոսի Երկրորդ Քալուստը, որպէսզի յաւիտենական կեանքը սկսի եօթներորդ օրուան վերջաւորութեան ութերորդ օրը, որ անվերջ պիտի ըլլայ:

ԹԻՒ (8)

Երբայերէնի մէջ «Շիմոնէ», որ կը նշանակէ պարարտացնել, ուրեմն՝ առատութիւն ցոյց տուող թիւն է: Աստուած վեց օրուան ընթացքին աւարտեց ստեղծագործութիւնը եւ ահա բոլորս կ'ապրինք եօթներորդ օրը: Եօթներորդ օրուան աւարտին պիտի սկսի Աստուծոյ ստեղծագործութեան ութերորդ օրը, որ անվերջ է եւ յաւիտենական: Քրիստոս յարութիւն առաւ Ծաղկազարդի յաղթական մուտքէն 8 օրեր ետք, մարդկութեան նոր կեանք պարգեւելով: Այսինքն թիւ 8-ը նոր եւ յաւիտեան կեանքը կը պատկերացնէ: Աստուածաշունչը յարութեան 8 հրաշք կը յիշէ: Անոնք յարութենէն ետք նոր կեանք մը սկսան ապրիլ: Տէրն մեր Յիսուս Քրիստոս կատարեց 3 յարութեան հրաշք՝ Հայրոսին աղջկան, Նայինի պատանհին եւ Ղազարոսին:

Պետրոս առաքեալ Յոպպէի մէջ յարութիւն տուաւ Տաբիթային:
Պօղոս առաքեալ Տրովադայի մէջ յարութիւն տուաւ Երիտասարդ Եւտիքոսին:
Հին Կտակարանին մէջ ալ կը հանդիպինք երեք յարութեան հրաշքի:

1. Եղիա մարգարէն աղօթքով յարութիւն տուաւ Սիդոնացիներու Սարեփայի որբուայրիի տղուն: (Գ.Թագ. 17):
2. Եղիսէ մարգարէ աղօթքով յարութիւն տուաւ Սունամացի կնոջ տղուն (Դ.Թագ. 4):
3. Եղիսէ մարգարէի աճիւններուն վրայ նետուած անձը կը վերակենդանանայ (Դ.Թագ. 13:21):

Տաճարի «Սրբութիւն Սրբոց» բաժնի չափերը $20 \times 20 \times 20 = 8 \times 1000$, Տաճարի «Սրբութիւն Սրբոց» բաժինը կը խորհրդանշէ երկնային յաւիտենական կեանքը, մինչ Հանդիպման Վրանի «Սրբութիւն Սրբոց» բաժնի չափերը $10 \times 10 \times 10 = 1000$ կը խորհրդանշէ երկնային սուրբ կեանքը՝ երկրի վրայ: Թիւ (888)-ը Յիսուսի երբայերէն անուան թիւն է: Թիւ 8-ը յաւիտենականութեան կ'ակնարկէ:

ԹԻՒ (9)

Թիւերու վերջինն է, ուրեմն վերջաւորութիւնը կամ բանի մը վերջաբանը կը ներկայացնէ: Թիւ (999)-ը Դատաստանի թիւն է, անոր կրկնութիւնը կը գտնենք Սոթոմ եւ Քոմորի պատմութեան մէջ:

Սիրելի ընթերցողներ,
Ձեր ուշադրութիւնը կ'ուզենք հրաւիրել թէ կրօնական էջը կը համադրէ համայնքիս հոգեւոր հովիւ՝ Տէր Արտակ Քինյ. Քէհեաեան:

ԿՆՈՋԱԿԱՆ

Երեկոյեան Խաղեր, Որոնք Կ'օգնեն...



Երեկոյեան ծնողները անհամբեր կը սպասեն, թէ երբ իրենց հրաշք մանուկը հանգիստ պիտի պառկի, աչքերը պիտի փակէ եւ անմիջապէս քունի անցնի: Սակայն կ'անցնին ժամեր, իսկ երեխան տակաւին կը թռչկոտէ:

Որպէսզի երեխան քնացնելը տանջանքի չվերածուի, կարելի է կազմակերպել երեկոյեան խաղեր, որոնք կ'օգնեն քնանալու առանց աւելորդ չափազանցութիւններու:

Թուղթ պատռելու խաղ

Երեխաները շատ կը սիրեն թուղթ պատռել եւ լսել պատռուող թուղթի ձայնը: Այս խաղը կը հանգստացնէ եւ կը մեղմացնէ անոնց լարուածութիւնը:

Օգտագործեցէք անպէտք օրաթերթերը, ամսաթերթերը, պատռեցէք ոչ կոպիտ եւ յարձակողական ձեւով, այլ հանգիստ, ապա քալեցէք կամ ցատկոտեցէք պատռուած թուղթերու կոյտին վրայ:

Գոց աչքերով խաղալիքները հաւաքել

Երեկոյեան թելադրելի է կազմակերպել խաղեր, ուր մրցակցութիւն չկայ: Օրինակ՝ գետին թափած խաղալիքները գոց աչքերով լեցնել խոշոր զամբիւղին մէջ: Երեխան թող ասիկա կատարէ առանց աճապարելու, ձեր ցուցմունքներով:

Ջուրով խաղ

Ջուրով խաղալը կ'օգնէ ձերբազատելու աւելորդ լարուածութենէ եւ կը հանդարտեցնէ ջիղերը: Այսպէս, երեխային առջեւ դրէք ջուրով լեցուն դոյլ մը, սպունգ մը եւ պարապ դոյլ մը: Թող երեխան սպունգին միջոցաւ լեցուն դոյլէն ջուրը փոխադրէ պարապին մէջ:



Բացի այս խաղերէն, ծնողները ուշադիր պէտք է ըլլան հետեւեալ կէտերուն.

- ա.- Երեկոյեան անջատել պատկերասփիւռը: Պաստառէն արձակուած էլեկտրամագնիսական ալիքները կը գրգռեն ուղեղը, ինչ որ կը վնասէ քունին:
- բ.- Երեխային գիրք կարդալու պարագային, նիւթը պէտք է ըլլայ բարի եւ դրական:
- գ.- Ժպտերես եւ սիրալիր մայրը աւելի արագ կը քնացնէ իր փոքրիկը, քան ջղային եւ կամակոր մայրը...

Այս բոլորին հետեւիլը այդքան ալ դժուար չէ: Այս խորհուրդները օգտագործելու պարագային, ձեր փոքրիկին քունը տանջալի չ'ըլլար թէ՛ ձեզի, եւ թէ՛ անոր համար: